

Udruženje sudija/sudaca Federacije Bosne i Hercegovine

Udruženje sudija Republike Srpske

Udruženje sudija Brčko Distrikta Bosne i Hercegovine

Udruženje tužilaca/tužitelja Federacije Bosne i Hercegovine

Udruženje tužilaca Republike Srpske

Broj: 56/25

Datum: 18.12.2025. godine

SAOPĆENJE ZA JAVNOST I POZIV NA REAKCIJU

Poštovani,

Iz određenih medijskih natpisa te istupa određenih političkih zvaničnika od prije dva dana (16.12.2025. godine), saznali smo da je u parlamentarnu proceduru upućen novi prijedlog Zakona o VSTV-u, koji potpisuju određeni politički predstavnici opozicionih partija iz RS-a.

Prijedlog je dostavljen na adresu Parlamentarne skupštine BiH dana 12.12.2025. godine te je zatraženo da se isti razmatra po hitnoj proceduri na sjednici Predstavničkog doma Parlamentarne skupštine BiH koja je zakazana za 22.12.2025. godine.

Ovim putem, strukovna udruženja pozdravljaju napore političkih predstavnika da daju svoj doprinos u izradi i usvajanju jednog od najvažnijih zakona u BiH, koji je ključan za ulazak naše zemlje u EU.

Sa druge strane, ponovo naglašavamo da pomenuti prijedlog nije prethodno dostavljen široj javnosti i nisu provedene javne konsultacije, čime je ovaj prijedlog ostao daleko od očiju javnosti i struke te nikome nije omogućeno njegovo javno razmatranje i nije ostavljena mogućnost za podnošenje primjedbi i prijedloga na sadržaj navedenog prijedloga Zakona o VSTV-u.

Osim toga, delegatima je ostavljeno manje od 10 dana da se upoznaju sa prijedlogom Zakona o VSTV-u, što je nedopustivo kratak rok za pripremu delegata da raspravljaju o obimnom tekstu prijedloga, pogotovo kad se zna da se radi o jednom od najvažnijih zakona čije je usvajanje ključno za ulazak BiH u EU.

Ovim putem ističemo svoje oštro protivljenje da se navedeni prijedlog Zakona o VSTV-u razmatra po hitnom postupku na sjednici Predstavničkog doma Parlamentarne skupštine BiH koja je zakazana za 22.12.2025. godine te apelujemo da se prije razmatranja pred Parlamentarnom skupštinom BiH provede transparentna javna rasprava – konsultacije o

ovom prijedlogu u koje bi bila uključene nevladine organizacije, stručna i akademska javnost, VSTV kao i Venecijanska komisija.

Donošenje najvažnijeg pravosudnog zakona u atmosferi pritiska sa ciljem da se što prije ispune uslovi za početak pregovora sa EU i bez stvarnog prostora i političke volje za kvalitetnu javnu raspravu, nosi ozbiljan rizik trajnog narušavanja vladavine prava u BiH. Umjesto stvarnih reformi, podnošenjem ovakvog prijedloga stvara se privid brzine djelovanja, dok se javnosti ne omogućava da ukaže na eventualne manjkavosti. Loše norme se teško naknadno popravljaju, dok se usvajanjem neadekvatnih rješenja naknadno stvaraju problemi u njihovom provođenju i proizvodi dugotrajna šteta.

Javne konsultacije bi trebale omogućiti dobijanje informacije o tome šta se tačno našlo pred Predstavničkim domom, a ovako ništa od toga neće biti poznato do trenutka kada prijedlog eventualno prođe određenu proceduru i bude kasno za bilo kakve intervencije i učešće javnosti.

Ponovo ukazujemo da pravosudna zajednica nije protiv donošenja Zakona o VSTV-u kao ni drugih reformskih zakona iz oblasti pravosuđa, ali insistiramo da se isti donose u propisanoj proceduri, te u skladu sa standardima Evropske Unije.

Ovim putem pozivamo na odgovarajuću reakciju sve relevantne aktere u političkom i javnom životu u BiH kako bi se omogućio transparentan i demokratski postupak razmatranja prijedloga Zakona o VSTV-u koji će obezbijediti poštivanje Evropskih standrada, očuvanje integriteta i neovisnosti sudija i tužilaca, a od čega se odstupa u aktuelnom prijedlogu koji je dostavljen u parlamentarnu proceduru.

S poštovanjem,

Udruženje sudija/sudaca Federacije Bosne i Hercegovine
Predsjednik Udruženja Elis Sultanić s.r

Udruženje sudija Republike Srpske
Zamjenik predsjednika Udruženja Nada Arsenić s.r.

Udruženje sudija Brčko Distrikta Bosne i Hercegovine
Predsjednik Udruženje Dragan Tomaš s.r.

Udruženje tužilaca/tužitelja Federacije Bosne i Hercegovine
Predsjednica Udruženja Šeila Heljić s.r.

Udruženje tužilaca Republike Srpske
Predsjednica Udruženja Živana Bajić s.r.